


Cumegn Albula/Alvra



Lescha da votaziun e d'elecziun digl cumegn Albula/Alvra (Lescha da votaziun e d'elecziun; LVE)

**Approvada dalla radunanza communal igls 22-08-2014
e messa an vigour dalla suprastanza communal per igl 01-01-2015**

**Revisiun parziala approvada dalla radunanza communal igls 19-07-2019
e messa an vigour per igls 01-10-2019**

Lescha da votaziun e d'elecziun digl cumegn Albula/Alvra (Lescha da votaziun e d'elecziun; LVE)

Sa basond agl art. 31 dalla constituziun digl cumegn Albula/Alvra, ò la radunanza communal decidia:

I. Disposiziuns generalas

Camp d'applicaziun

Art. 1

La lescha vala per elecziuns e votaziuns communalas digl cumegn Albula/Alvra.

Dretg subsidiar

Art. 2

Schinavant tg'igl è definia an suadont navot oter, valan per las elecziuns e votaziuns an tgossas da cumegn las determinaziuns dalla lescha e dall'ordinaziun davart igls dretgs politics aint igl cantun Grischun.

Register electoral

Art. 3

¹ La controlla d'abitants magna igl register dallas persungas cun dretg da votar tgi abiteschan aint igl cumegn. Persungas cun dretg da votar dastgan piglier invista da tot taimp aint igl register electoral. Protestas cunter la refusaziun dalla recepziun aint igl register electoral, on da neir inoltradas alla suprastanza communal.

² Igl register electoral vign verifitgia avant mintga votaziun.

Material da votaziun
ed attest da votar

Art. 4

¹ Las persungas cun dretg da votar, tgi èn purtadas aint igl register electoral, survignan dalla canzleia communal igl material da votar cun igl attest da votar igl pi tard 10 deis avant igl termin da votaziun, resp. d'elecziun.

² Ò ena persunga cugl dretg da votar betg survagnia igl material da votar, ò ella da pretender tal tar dalla controlla d'abitants igl pi tard igl venderde avant la votaziun.

II. Cumegn d'urna

1. Disposiziuns generalas

Exposiziun dall'urna

Art. 5

Per mintga elecziun u votaziun all'urna vign en'urna exponeida an tgesa communal a Casti.

Survigilaziun

Art. 6

Mintga urna ò da neir survigilada d'aglmanc dus persungas, tgi vignan fixadas dalla suprastanza communal.

Votaziun facilitada

Art. 7

¹ Las stipulaziuns cantunales davart dalla votaziun facilitada e la votaziun an scretg, valan er per votaziuns ed elecziuns communalas.

² La votaziun anticipada è lubeida durant igls taimps da biro d'avent dalla mesemda anfignen igl venderde avant igl termin da votaziun. Scu uffezi responsabel vign definia la canzleia communal.

Biro da votaziun
a. Organisaziun

Art. 8

¹ La suprastanza communal eligia en biro d'elecziun e nominescha igl president resp. la presidenta scu er igl actuar resp. l'actuara da chel biro.

² Agl biro da votaziun vign assignia igl domber necessari da dombravouschs. Per funcziuns accessoricas tar elecziuns u votaziuns, pò igl biro da votaziun ed elecziun neir amplifitgia cun persunal da cumegn.

b. Pensums

Art. 9

Igl biro da votaziun constatescha igl resultat dalla votaziun u elecziun. El eruescha igl total dallas persungas cun dretg da votar, digls cedels da votar antros, digls cedels veids, nunvalevels e valevels, dallas vouchs da candidats, scu er dallas vouchs EA e vouchs NA. Igl biro da votaziun decida davart la valevladad da cedels da votar e vouchs.

c. Protocol e publicaziun

Art. 10

¹ Da mintga votaziun ed elecziun redigescha igl biro da votaziun en protocol.

² Igls resultats da votaziun ed elecziun vignan publitgias aint igl organ da publicaziun uffizial, scu er sen internet.

Valevladad digls
cedels da votar
a. General

Art. 11

Cedels da votar u tals tgi èn amplanias or oter tgi a mang, tgi cun-
tignan expectoraziuns offendentas u caracterisaziuns evidentas, èn
malligibels u demossan betg ena clera manifestaziun da voluntad, èn
nunvalevels.

b. Tar elecziuns

Art. 12

¹ Cedels da votar per elecziuns cumplessivas, tgi portan pi pacs
noms tgi persungas tgi èn d'eliger, èn valevels. Er valevels èn cedels
da votar, tgi portan daples noms tgi persungas tgi èn d'eliger; pero
vignan stritgias igls davos noms numnos, schinavant tgi els èn
danvanz.

² Ena vusch per ena persunga nuneligibla, u tgi sa referescha sen
en nom tgi è gio scretg sen chel cedel da votar (cumulaziun) u tgi
lascha dubitar per tgi tgi el vala, è nunvalevel; igl nom respectiv vign
stritgia.

2. Votaziuns

Erueida digls resultats
da votaziun

Art. 13

¹ Tar votaziuns davart dumondas specificas, decida la maioritad dal-
las vuschs valevlas. Igls cedels da votar veids e nunvalevels vignan
betg risguardos.

² Tar egualitad dallas vuschs è igl project da votaziun sbitto.

3. Elecziuns

Presidi communal

Art. 14

¹ Per igl amprem scrutini vala la maioritad absoluta. Igl domber total
da tot las vuschs valevlas per persungas tgi candideschan, vign
partia tras dus. La proxima cefra antiera è la maioritad absoluta.
Contanscha nign candidat la maioritad absoluta, suonda igl pi tard
siva quatter emdas en sagond scrutini.

² Per igl sagond scrutini vala la maioritad relativa. Eligia è chel tgi
survign las pi bleras vuschs.

³ Candidats/As, tgi vottan betg sa participar ple agl sagond scrutini,
pon retrer an scretg lour candidatura tar la canzleia communal,
anfignen tschintg deis siva digl amprem scrutini.

Suprastanza communal

Art. 15

¹ Igl pi tard quatter emdas siva dall'elecziun digl mastral, suonda all'urna l'elecziun dalla suprastanza.

² Mintga cumegn uriund ò igl dretg d'en mandat an suprastanza.

³ Eligeidas èn chellas persungas tgi obtignan las pi bleras vouchs e tgi on domicil ainten egn digls cumegns actuals.

⁴ Sa metta ainten egn u ples digls cumegns uriunds nign a disposiziun per l'elecziun, vala scu eligeida la persunga tgi candidescha, resp. las persungas tgi candideschan, cun las pi bleras vouchs da chels tgi èn betg nias eligias dad oters cumegns.

⁵ Tar equalitad dallas vouchs decida la bistgetta.

Cumischung da gestiun

Art. 16

¹ L'elecziun dalla cumischung da gestiun succeda all'urna igl madem mument scu l'elecziun digl mastral.

² Eligeidas èn las persungas tgi on obtignia las pi bleras vouchs. Tar equalitad dallas vouchs decida la bistgetta.

Propostas d'elecziun e
lour publicaziun

Art. 17

Propostas d'elecziun tgi èn neidas inoltradas alla canzleia communal anfignen igl pi tard igl sagond glindesde avant las elecziuns, vignan publitgeidas aint igl organ da publicaziun uffizial ed aint igl internet.

Acceptaziun/refusaziun
dall'elecziun

Art. 18

Chel tgi refusescha betg an scretg l'elecziun an terma da tschintg deis siva digl de da votaziun, ò accepto tala.

Elecziun da cumischungs
e delegos

Art. 19

L'elecziun da cumischungs e delegos sa drezza alla constituziun communal.

III. Radunanza communal

Convocaziun

Art. 20

¹ La radunanza communal vign convocada dalla suprastanza communal ed exequida per regla a Casti.

² I dastga neir piglia conclus angal davart d'objects da tractativas, tgi èn nias predeliberos dalla suprastanza communal ed èn enumeros sen la glista da tractandas, tgi vign communitgeida aglmanc 10 deis avant la radunanza communal.

Abilitad da decisiun

Art. 21

Mintga radunanza communal convocada ordinariamaintg è cumpetenta da decider.

Presidi dalla radunanza

Art. 22

La radunanza communal vign manada digl mastral u dalla mastrala. Per cass d'impedimaint surpeglia igl vicemastral u la vicemastrala u en oter commember da suprastanza igl sies post.

Dombravouschs

Art. 23

La radunanza communal eligia igls dombravouschs basignevels.

Modus da votaziun

Art. 24

¹ Las votaziuns vignan manadas tras avertas. Ellas on da neir fatgas sot scrutini, schi ena quarta dallas persungas cun dretg da votar u la suprastanza communal pretendan chegl.

² Decisiva è tar ena votaziun averta la pluralitad digls votants. Tar egalitad dallas vouchs decida igl mastral.

³ Tar la votaziun sot scrutini è la pluralitad dallas vouchs valevlas decisiva. Cedels da votar veids vignan betg dumbros. Tar egalitad dallas vouchs è igl project da votaziun sbitto.

IV. Disposiziun finalas

Abrogaziun digl dretg
precedent

Art. 25

Cun l'antrada an vigour da chesta lescha vignan dissolvias la lescha davart votaziuns ed elecziuns digls 22 d'avost 2014 scu er tot igls decrets tgi stattan an cuntradicziun cun tala.

Referendum

Art. 26

La lescha preschainta è sottamessa agl referendum facultativ.

Vigour

Art. 27

La suprastanza communal fixescha igl termin per l'antrada an vigour da chesta lescha.


Approvada dalla radunanza communal digls 19 da fanadour 2019.

Igl mastral



Daniel Albertin

Igl rivant da cumegn



Maurus Engler